



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
ZASTUPNIČKI DOM

Broj: 01-011-102/01.
Sarajevo, 26. ožujka 2001.

Z A P I S N I K

sa 5. sjednice Zastupničkog doma Parlamentarne skupštine Bosne i Hercegovine,
održane 26. ožujka 2001.

Peta sjednica Zastupničkog doma počela je s radom u 11,20 sati. Nazočno je bilo 36 zastupnika. Izostanak su opravdali zastupnici Mirko Banjac i Ivo Lozančić. Poslanci Hrvatske demokratske zajednice Mirko Baković, Miro Grabovac – Titan, Mariofil Ljubić i Zdenko Vukić nisu prisustvovali sjednici, shodno dopisu HDZ-a kojim obavještavaju Zastupnički dom o daljnjem odsustvovanju ove stranke iz zakonodavne i izvršne vlasti.

Sjednici doma bili su nazočni članovi Vijeća ministara, predstavnici OHR-a, OSCE-a, Europske unije, Promatračke misije u BiH, predstavnici ambasada SAD, Velike Britanije i Švedske.

Prije prelaska na raspravu o prijedlogu dnevnog reda predsjedatelj Doma dr. Sead Avdić predložio je da Dom, kao prethodno pitanje, izvrši verifikaciju zastupničkog mandata novim zastupnicima. Tim povodom upoznao je Dom da je od predsjedatelja Privremenog izbornog povjerenstva, ambasadora Roberta Berija, dobio obavještenje da je prihvatio ostavke gospode Zlatka Lagumdžije i Muharema Imamovića na zastupničke dužnosti, te da je PIK, na osnovu Pravila i propisa, utvrdila da su sljedeći kvalificirani kandidati na listi Socijal-demokratske partije za Zastupnički dom gospoda Boro Bjelobrk i Jozo Križanović.

Također je predsjedatelj informirao Dom da je od predsjedatelja Privremenog izbornog povjerenstva obaviješten da je Odlukom Visokog predstavnika g. Ivo Andrić – Lužanski smijenjen sa dužnosti zastupnika u Zastupničkom domu, te da je PIK utvrdila da je sljedeći kvalificirani kandidat na listi Hrvatske demokratske zajednice za Zastupničkog dom gospodin Marko Amidižić. U svezi s ovom odlukom PIK-a predsjedatelj Avdić je podsjetio zastupnike i na pismo koje je glavni tajnik Hrvatske demokratske zajedice uputio Privremenom izbornom povjerenstvu i Ambasadoru Robertu Beriju, a koje su zastupnici dobili na klupe. Rekao je, pored ostaloga, da je bio dužan da zastupnike upozna sa spomenutim pismom, ali da ono ne obvezuje Zastupnički dom. “Mi prihvatamo odluke Visokog predstavnika kao legitimne i utemeljene u Dejtonskom sporazumu, odlukama Odboja Vijeća za implementaciju mira u Bosni i Hercegovini, deklaracijama Bonske i Madridske konferencije i dr., i u tom kontekstu reakcija HDZ-a je bespredmetna”, rekao je predsjedatelj Avdić i poželio dobrološlicu novim zastupnicima u Zastupnički dom, te ih pozvao da daju svečanu prisegu.

Svečanu prisegu pred Domom dali su novi zastupnici Boro Bjelobrk, Jozo Križanović i Marko Admidžić.

Također su pred Domom svečanu prisegu dali i gospođa Gordana Ković, zamjenik ministra za trezor institucija BiH i gospodin Jadranko Prlić, zamjenik ministra za vanjsku trgovinu i ekonomske odnose.

Poslije davanja svečane prisege predsjedatelj je obavijestio zastupnike da je izaslanstava Zastupničkog doma u sastavu: dr Željko Mirjanić, prvi zamjenik predsjedatelja Doma, dr Mediha Filipović, zastupnik u Zastupničkom domu i g. Vedran Hadžović, tajnik Zajedničke službe Parlamentarne skupštine BiH, bila na susretu predsjednika parlamenata država Jugoistočne Europe. Jedan član izaslanstva, g. Ivo Lozančić, nije bio nazočan ovom skupu zbog spriječenosti.

Prvi zamjenik predsjedatelja, g. Željko Mirjanić, u svojstvu šefa izaslanstva, ukratko je informirao Dom o spomenutom susretu. Pored ostaloga, rekao je da je to bila Konferencija predsjednika parlamenata zemalja Jugoistočne Europe i da je on, kao zamjenik predsjedatelja, na konferenciji iznio stav Parlamenta, odnosno Bosne i Hercegovine. Rekao je da će zastupnici u tijeku sjednice dobiti njegov govor, kao i deklaraciju koja je na Konferenciji usvojena od svih sudionika. Istaknuo je da Deklaracija potpuno odgovara vanjskoj politici Bosne i Hercegovine. Gospodin Mirjanić je napomenuo da je izaslanstva Zastupničkog doma imala sastanke sa svim drugim izaslanstvima na Konferenciji i da su dogovorili konkretnu suradnju, shodno dogovoru na Kolegiju Zastupničkog doma, o čemu će zastupnici također biti obaviješteni.

U nastavku sjednice predsjedatelj Avdić je upoznao zastupnike da je u pripremi 5. sjednice održana sjednica Kolegija u proširenom sastavu, na kojoj je usuglašen termin održavanja 5. kao i 6. sjednice Doma, kao i prijedlozi dnevnog reda. Također je upoznao zastupnike da ni na ovoj sjednici nije bio nazočan član Kolegija g. Mariofil Ljubić, kao ni predstavnik Kluba zastupnika HDZ-a. Predsjedatelj Avdić je informirao zastupnike da je neposredno pred početak sjednice Doma održana zajednička sjednica koleija' oba doma Parlamentarne skupštine u svezi s 16. točkom dnevnog reda – Izbor parlamentarnih delegacija, kako bi za ovu sjednicu pripremili prijedlog sastava parlamentarnih izaslanstava te da taj posao nije završen. Zato je Kolegij predložio da se ova točka odloži za 6. sjednicu. Kolegij je, također, predložio da se za 6. sjednicu odloži razmatranje Izvješća o realizaciji Aneksa VII Općeg okvirnog sporazuma za mir u BiH, zbog potrebe da novo Vijeće ministara pripremi dodatnu informaciju, s obzirom da je Izvješće podnesen od starog Vijeća ministara i s obzirom na vrijeme kad je podnesen.

Predsjedatelj je skrenuo pozornost zastupnicima da je Vijeće ministara podnijelo zahtjev Domu da na 6. sjednicu uvrsti Prijedlog proračuna institucija BiH i međunarodnih obveza BiH za 2001. i Prijedlog zakona o izvršenju Proračuna, čije je usvajanje prioritetno s obzirom da krajem mjeseca ožujka ističe rok primjene Odluke o privremenom financiranju. Podsjetio je zastupnike na mogućnost podnošenja amandmana i pozvao nadležne komisije da zauzmu svoje stavove.

U okviru rasprave o prijedlogu dnevnog reda diskutirali su zastupnici Zoran Spasojević, Miloš Jovanović, Beriz Belkić i Adem Borić, kao i zamjenik ministra za trezor institucija BiH Muharem Imamović.

Poslije diskusije usvojen je sljedeći

D N E V N I R E D:

1. Usvajanje Zapisnika sa 3. i Zapisnika sa 4. sjednice Zastupničkog doma,
2. Sporazum o razvojnom kreditu (Projekat vodoopskrbe i kanalizacije za Mostar) između Bosne i Hercegovine i Međunarodne asocijacije za razvoj;

3. Ugovor o financiranju između Bosne i Hercegovine i Europske investicione banke broj: 20.515-Projekat za puteve BiH;
4. Okvirni sporazum o zajmu između Banke za razvoj Vijeća Europe i Bosne i Hercegovine, za projekat vodoopskrbe Tuzle;
5. Sporazum između Vlade Kraljevine Belgije i Vijeća ministara Bosne i Hercegovine o davanju financijske pomoći Vlade Kraljevine Belgije Vijeću ministara;
8. Građansko-pravna konvencija protivu korupcije;
7. Krivično-pravna konvencija protivu korupcije;
8. Dopunski protokol uz konvenciju o zabrani ili ograničavanju uporabe određenih vrsta klasičnog oružja koja se mogu smatrati uzročnicima prekomjernih traumatskih efekata ili imaju neselektivno djelovanje;
9. Konvencija međunarodne organizacije rada broj 182. o najgorim oblicima iskorištavanja dječijeg rada;
10. Sporazum o unapređenju i zaštiti investicija između Bosne i Hercegovine i Vlade Republike Finske;
11. Sporazum o unapređenju i zaštiti investicija između Bosne i Hercegovine i Švedske;
12. Sporazum između Vijeća ministara BiH i Saveznog vijeća Švicarske o ponovnom prihvatu državljana BiH i državljana Švicarske;
13. Sporazum između Vijeća ministara BiH i Vlade Republike Makedonije o međunarodnom cestovnom prevozu putnika i robe;
14. Informacija o pitanjima vezanim za "balkanski sindrom",
15. Odgovori na zastupnička pitanja i pitanja zastupnika.

Ad – 1: Usvajanje Zapisnika sa 3. i Zapisnika sa 4. sjednice Zastupničkog doma

Povodom zapisnika' diskutirali su: Željko Bilbija, Abdurahman Malkić, Tihomir Gligorić, Miloš Jovanović i Ibrahim Đedović.

Željko Bilbija, u ime Kluba zastupnika PDP-SNS-SNSD/DSP-SPRS, zatražio je da im se u pisanoj formi dostavi izlaganje predsjedatelja Vijeća ministara Božidara Matića koje je podnio na 4. sjednici Doma.

Abdurahman Malkić je također zatražio izlaganje predsjedatelja Vijeća ministara. Prigovorio je što u Zapisniku sa 3. sjednice, u dijelu gdje je rečeno da je disakusija Branislava Lolića izazvala više replika, nije navedeno u kojem smislu su bile replike, da li je to bilo afirmativno ili je bilo loše po ostale zastupnike. Iznio je svoje mišljenje da je Lolić iznio dvije konstatacije koje ne idu u prilog ovom domu.

Tihomir Gligorić je, govoreći o Zapisniku sa 4. sjednice, rekao da su veoma korektno unesene primjedbe i sugestije koje su dali zastupnici na program predsjedatelja Vijeća ministara g. Božidara Matića, kao i pitanja koja su mu postavili, ali da uopšte nije rečeno šta je g. Matić odgovorio. Rekao je da bi bilo korektno da se u tehničkom i u suštinskom smislu to naglasi u Zapisniku.

Ibrahim Đedović je zatražio da se u zapisnike, po imenu i prezimenu, tačno navodi ko je bio prisutan sjednicama Doma.

Poslije diskusije o zapisnicima predsjedatelj je konstatirao da se sve iznesene primjedbe mogu usvojiti i u ime Kolegija i Tajništva je rekao da će se u cjelosti poštivati procedura vođenja sjednice i nazočnost zastupnika i gostiju. Također je konstatirao da se

privhata obveza predsjedavajućeg Vijeća ministara da autorizira svoje izlaganje na 4. sjednici i da se hitno dostavi zastupnicima.

Zamjenik ministra za trezor institucija BiH, Muharem Imamović, obavijestio je Dom da je ekspozice predsjedatelja Matića bio gotov prije 20 dana, da je predviđena zajednička sjednica Kolegija Doma i Vijeća ministara koja još nije održana, te da je to razlog zašto zastupnici nisu dobili ekspozice. Predložio je da se zaduži Služba da se ekspozice danas zastupnicima dostavi.

Predsjedatelj Avdić je, povodom diskusije g. Imamovića, naglasiso da nije bila nužna nikakva suglasnost Kolegija da bi zastupnici dobili izlaganje predsjedatelja Vijeća ministara. Zatim je g. Avdić dao na glasovanje zapisnike sa 3. i 4. sjednice Doma, uz konstataciju da su prihvaćene sugestije i primjedbe iznesene u diskusiji.

Dom je jednoglasno usvojio Zapisnik sa 3. i Zapisnik sa 4. sjednice Zastupničkog doma.

Ad 2 – 13:

Predsjednik Komisije za financije i proračun, gospodin Beriz Belkić podnio je jedinstveno Izvješće te komisije o razmatranju sporazuma za koje je ova komisija nadležna. To su točke 2, 3, 4, 5, 10. i 11. dnevnog reda. Izrazio je nezadovoljstvo zbog nenazočnosti predlagača određenih materijala, ni iz Predsjedništva BiH niti iz resornih ministarstava.

Obavljena je pojedinačna rasprava o svim ovim točkama.

U diskusiji su sudjelovali zastupnici: Tihomir Gligorić, Ljubomir Kovačević, Senad Šarganović, Zoran Spasojević, Mirza Kušljagić, Sead Avdić, Beriz Belkić, Ibrahim Dedović, Mediha Filipović i Sead Buturović.

Gospodin Osman Brka podnio je Izvješće Ustavno-pravne komisije o razmatranju Građansko-pravne konvencije protivu korupcije (točka 6.) i Krivično-pravne konvencije protivu korupcije (točka 7), kao i Izvješće Komisije za ljudska prava, imigraciju, izbjeglice i azil o razmatranju Konvencije o međunarodnoj organizaciji rada broj 182. o najgorim oblicima iskorišćavanja dječijeg rada (točka 9).

Gospođa Mediha Filipović podnijela je Izvješće Komisije za vanjske poslove o razmatranju točke 8. – Dopunski protokol uz Konvenciju o zabrani ili ograničavanju uporabe određenih vrsta klasičnog oružja koja se mogu smatrati uzročnicima prekomjernih traumatskih efekata ili imaju neselektivno djeinstvo, i točke 8. – Sporazum između Vijeća ministara BiH i Vlade Republike Makedonije o međunarodnom drskom prevozu putnika i robe.

Poslije diskusije Zastupnički dom je, glasujući ponaosob o svakom, dao suglasnost za ratificiranje:

- Sporazuma o razvojnom kreditu (Projekat vodoopskrbe i kanalizacije za Mostar) između Bosne i Hercegovine i Međunarodne asocijacije za razvoj (jednoglasno);
- Ugovora o financiranju između Bosne i Hercegovine i Europske investicione banke broj: 20.515-Projekat za puteve BiH (jednoglasno);
- Okvirniog sporazum o zajmu između Banke za razvoj Vijeća Europe i Bosne i Hercegovine, za projekat vodoopskrbe Tuzle (jednoglasno);
- Sporazuma između Vlade Kraljevine Belgije i Vijeća ministara Bosne i Hercegovine o davanju finansijske pomoći Vlade Kraljevine Belgije Vijeću ministara (34 ZA, jedan suzdržan);
- Građansko-pravne konvencije protivu korupcije (jednoglasno);

- Krivično-pravne konvencije protivu korupcije (jednoglasno);
- Dopunskog protokola uz konvenciju o zabrani ili ograničavanju fuporabe određenih vrsta klasičnog oružja koja se mogu smatrati uzročnicima prekomjernih traumatskih efekata ili imaju neselektivno djeystvo (jednoglasno);
- Konvencije međunarodne organizacije rada broj 182. o najgorim oblicima iskorišćavanja dječijeg rada (jednoglasno);
- Sporazuma o unapređenju i zaštiti investicija između Bosne i Hercegovine i Vlade Republike Finske (jednoglasno);
- Sporazuma o unapređenju i zaštiti investicija između Bosne i Hercegovine i Švedske (jednoglasno);
- Sporazuma između Vijeća ministara BiH i Saveznog vijeća Švicarske o ponovnom prihvatu državljana BiH i državljana Švicarske (jednoglasno);
- Sporazuma između Vijeća ministara BiH i Vlade Republike Makedonije o međunarodnom cestovnom prevozu putnika i robe (jednoglasno).

U svezi s točkom 4. – Okvirni sporazum o zajmu između Banke za razvoj Vijeća Europe i Bosne i Hercegovine, za projekat vodoopskrbe Tuzle, predsjedatelj g. Avdić je, povodom zahtjeva iz diskusije, predložio da se Domu dostavi informacija o stanju vodoopskrbe u Bosni i Hercegovinu, o uloženim sredstvima u postdejtonskoj BiH i o projektima koji su u fazi realiziranja, kako bi se na bazi relevantnih informacija moglo razmišljati o drugim interventnim projektima sa gledišta vodoopskrbe cijele Bosne i Hercegovine.

Također je predsjedatelj Avdić uputio sugestiju realizatoru projekta za Tuzlu da pokuša odvojiti dio sredstava ili bar da sačini studiju izvodljivosti vodoopskrbe regije Istične Bosne, sa Zvornikom, Tuzlom i ostalim mjestima, sa rijeke Drine.

Sugerirano je, također, da se aktualizira, odnosno inovira i ažurira Informacija o zaduženosti Bosne i Hercegovine i o spoljnom dugu, da se zna ko je krajnji otplatilac duga – da li je to BiH, Federacija BiH ili Republika Srpska.

Ad – 14: Informacija o pitanjima vezanim za balkanski sindrom

U diskusiji povodom ove točke dnevnog reda sudjelovali su zastupnici: Mirko Mijatović, Senad Šarganić, Boro Bjelobrk, Beriz Belkić, Sead Buturović, Dušan Stokić, Branislav Lolić, Tihomir Gligorić i Momir Tošić, te ministar vanjskih poslova Zlatko Lagumdžija i zamjenik ministra za vanjske poslove Ivica Mišić.

Poslije diskusije Zastupnički dom je usvojio sljedeće:

Z A K L J U Č K E

1. Prihvata se Informacija Vijeća ministara Bosne i Hercegovine o pitanjima vezanim za “balkanski sindrom”, kao i aktivnosti i mjere koje je preduzelo Vijeće ministara.

2. Sugerira se Vijeću ministara Bosne i Hercegovine da preispita mogućnost definiranja prijedloga prema Ujedinjenim narodima o mogućoj zabrani uporabe municije sa osiromašenim uranom.

3. Traži se od Vijeća ministara da Zastupnički dom informira o suradnji Bosne i Hercegovine sa Međunarodnom agencijom za atomsku energiju i o problemima koji se u toj oblasti javljaju.

4. Neophodno je uspostaviti kontinuitet u mjerernju radio-aktivnog zračenja na prostoru Bosne i Hercegovine, uz izradu primjerenih karata i svega ostalog što prati cjelokupan ovaj proces.

5. Sugerira se nadležnim institucijama da uspostave jedinstven registar oboljenja od karcinoma na nivou Bosne i Hercegovine, povezujući entitete i u tom kontekstu da sačine jedinstven registar i statističku obradu, kako bi se stvorila slika o mogućim uzrocima koji dovode do oboljenja od karcinoma.

6. Parlamentarna skupština Bosne i Hercegovine treba da bude u cjelosti i u kontinuitetu informirana o svim događajima vezanim za tzv. balkanski sindrom

7. Vijeće ministara treba hitno, na osnovu saznanja entitetskih komisija koje su formirane pri zavodima za javno zdravstvo, Interesorskog ministarskog vijeća i Vijeća ministara, izaći pred javnost sa oficijelnom i utemeljenom informacijom sa gledišta mogućih posljedica koje su mogla proizvesti dejstva NATO-pakta primjenom municije sa osiromašenim uranom u smislu ugroženosti bosanskohercegovačkog tla, vode i vazduha, kao i stanja zdravlja građana Bosne i Hercegovine.

Informacija i zaključci usvojeni su s 36 glasova ZA i dva suzdržana.

Ad – 15: Odgovori na zastupnička pitanja i pitanja zastupnika

MEDIHA FILIPOVIĆ:

Predložila da se na dnevni red Doma stavi pitanje ispunjavanja uslova za prijem BiH u Vijeće Europe. Također je predložila da se g. Laslo Šurjan, koji je izvještač ispred Komiteta za politička pitanja Vijeća Europe, kao i gospođa Jattenmaki, izvještač Komiteta za poštivanje ljudskih prava, pismeno obavijeste da su formirane zajedničke službe državnih institucija BiH, jer je to bio preduvjet za nastavak razgovora sa Parlamentom BiH o prijemu BiH u Vijeće Europe, te ih pozvati da posjete Bosnu i Hercegovinu i nastave proces prijema BiH u Vijeće Europe.

IBRAHIM ĐEDOVIĆ:

1. Da li postoje objedinjeni podaci o ilegalnoj migraciji kroz Bosnu i Hercegovinu, da li postoje podaci o ljudima koji su vraćeni iz drugih država po tom osnovu i da li se neki tim na nivou države ozbiljnije bavi ovim pitanjem, te šta bi ovaj dom trebao učiniti u tom pravcu da se ovaj problem svede na što je moguće manju mjeru?

2. Da li u Minsitarstvu vanjskih poslova postoji prijedlog mjera ili bar nagovještaja da se izmjenom vlasti u BiH vizni režim za građane BiH učini lakšim, prvenstveno sa zemljama Europske unije? Šta zastupnici trebaju učiniti da bi se vizni režim olakšao? (Posebno je istakao problem naših građana koji imaju privremene dozvole u Njemačkoj i Švaicarskoj).

ABDURAHMAN MALKIĆ:

Na koji način Vijeće ministara i Parlament misle zaštititi BiH kao jedinstveno ekonomsko, privredno i tržišno područje? (spomenuo različite cijene nafte i pitanje ubiranja carine vezano za najnovija dešavanja oko HDZ-a).

ZORAN SPASOJEVIĆ:

Na sjednici postavio pitanje: Zašto je iz procedure povučen prijedlog zakona o dopuni Zakona o carinskoj tarifi i kada će doći novi prijedlog?

Pored ovog pitanja, u pisanoj formi g. Spasojević je dostavio tri pitanja:

1) Koliko Bosna i Hercegovina ima ambasada u svijetu (u kojim državama): a) koliko ima zaposlenih u ambasadama; b) koliko ima zaposlenim Bošnjaka, Srba i Hrvata – pojedinačno za svaku ambasadu;

2) Kada će Klub zastupnika Srpske demokratske stranke dobiti prostorije da bi mogao valjano obavljati svoje poslove i zadatke predviđene Poslovníkom Doma?

3) Kada će se gospođa Smilja Šarčević moći vratiti u svoj stan na opštini Ilidža koji je njeno vlašništvo 1/1.

BRANISLAV LOLIĆ:

Podržao je pitanje g. Đedovića vezano za olakšavanje viznog režima sa zemljama Europske unije i predložio da se nosiocima diplomatskih i službenih pasoša uvede bezvizni režim.

Zatražio je da se za narednu sjednicu pripremi obavještenje ko sve može imati službeni pasoš.

OMER FILIPOVIĆ:

Da li će Vijeće ministara aktualizirati materijale koje su zastupnici već dobili i pripremiti svoje komentare i dopune (misli na materijale Vijeća ministara i zastupnika ranijeg saziva)?

MUHAMED BEGOVIĆ:

Po kojem je pravnom osnovu IMC - Nezavisna komisija za medije mogla donijeti 5. februara 2001. odluku kojom odbija davanje suglasnosti odnosno dugoročnu dozvolu Bošnjačkoj radio-stanici "Yeni Hayat" za emitiranje u regiji Tuzla?

TIHOMIR GLIGORIĆ:

Založio se da svi zastupnici dobiju diplomatske putovnice. Predložio da se i službenim pasošima daju vize na šest mjeseci, kao što je i u diplomatskim, iz razloga što službene pasoše koriste, prije svega, direktori iz privrede, čime bi im se olakšao rad.

Ministar vanjskih poslova, g. Zlatko Lagumdžija, usmeno je na sjednici odgovorio na dio pitanja koja su se odnosila na MIP. Rekao je da će zastupnici odgovore dobiti i u pisanoj formi.

Poslije izlaganja ministra Lagumdžije predsjedatelj Avdić je upoznao Dom da su predstavnici Komiteta ministara Vijeća Europe nedavno posjetili BiH, da su razgovarali sa Vijećem ministara, sa predstavnicima oba doma Parlamentarne skupštine i komisijama. Istaknuo je da ima osnova da su poslali pozitivno izvješće Vijeću Europe i da su se u tom kontekstu stekle pretpostavke za reaktiviranje zahtjeva za prijem Bosne i Hercegovine u Vijeće Europe.

Predsjedatelj Avdić je Istaknuo da će Parlamentarna skupština u pisanoj formi obavijestiti Vijeće Europe da su formirane sve centralne institucije u BiH i time implementirani rezultati općih izbora u studenom 2000.

Ovim je predsjedatelj zaključio 5. sjednicu. Sjednica je s radom završila u 14,15 sati.

Sastavni dio ovog zapisnika je magnetogram 5. sjednice Zastupničkog doma.

TAJNIK
ZASTUPNIČKOG DOMA
Branka Todorović

PREDSJEDATELJ
ZASTUPNIČKOG DOMA
dr. Sead Avdić